

istud , imò penè unicum luctuosæ nobis hereditatis solatium , sed tamen longè infrâ desiderium tanti viri , à quo solemne hoc , utpotè legitimum , officium præstitum oportebat. Verùm dùm affecto ille opere quod pridem Incomparabili non TUO magis , quàm Hispaniæ totius PARENTI nuncupaverat , jamjàm sibi quasi propèdiem voti compoti futuro blandiebatur , supremum eidem omnium , communeque mortalitati officium Immortali Sæculorum Regi persolvendum omninò fuit. Nec pòst multò , quasi alius alium trahere , aut urgere videretur , extinctum luxit Hispania nostra , ac Europa propèmodum omnis eximium illum , nec ulli cessurum ævo PARENTEM TUUM ; ut proindè nuspiam propriùs aliàs theatrales Erionys ludos agere visa sit , dùm mutatâ repentè scenâ , qui primas in ea duxerant , in mutatoria jussi sunt , non ultrà in proscenium prodituri. Verùm cùm quàm non lentè in præcordijs TUIS spirent Gentilitij BORBONIDUM ignes , non jam nobis augurari modò , sed cernere quoque Divino beneficio datum sit ; cùm quas animi , corporisque dotes incomparabiles in uno PHILIPPO BORBONIO amissas dolumus , justitiam nempè , clementiam , facilitatem , constantiam , fortitudinem , reliquasque imperatorias artes , easdem ità in TE reflorescere videamus , ut illum planè redivivum exhibeas : nihil in hac parte cùm Auctoris , tùm communi nostrum omnium voto detractum iri arbitrabitur quicumque postumam hanc illius prolem MAJESTATI TUÆ consecratam viderit. Nihil proptereà de ea quam Auctor Augustissimo PARENTIS TUI Nomini inscripserat nuncupatoria epistola detrahendum rati , ipsam denuò MAJESTATI TUÆ sistimus , utcumquè tamen nostris lacrymis deformatam ; Quamquàm etenim Auctor Collegium hocce TUUM , cujus dudum alumnus fuerat , imoveriùs Sacellum ipsius Regium , sacro videlicet ornatu , ac supellectile instruendum ex triente tantum bonorum instituisset : delatam tamen nobis arbitrati sumus ex asse conditionem honestissimam , TE nempè in PATRIS prædefuncti locum suffectum per litteras compellandi , nec ulli uspiam mortalium communicandam alteri. Eà verò nos libentiùs utimur , REX AUGUSTISSIME , cùm quòd alloqui Deorum discipulos , quomodò Plato Reges appellare solitus erat , eximium quoddam sit , tùm etiam quia Auctoris hoc pacto famæ consultum iri arbitramur , si quem ipse Regij Psaltis versum elegantissimæ iconi PARENTIS TUI subscriptum voluit in fronte operis , eundem & in TE transferri patiàre non invitus. Sunt etenim etiam hoc sæculo , in quo ob renatas in Hispania nostra litteras TIBI gratulamur ex animo , morosi quidam verborum captatores , infelix nempè lolium uberrimæ melsis , qui neglectis intereà rebus ,